



L'onn proxim vul il cussegl federal sutta metter als acturs la nova strategia e propostas concretas per frenar ils custs da sanadad. SO

# Avrir ils cunfins per medicaments?

## Strategia per franar ils custs per la sanadad

DA LUCAS DEPLAZES / ANR

■ **Il cussegl dals chantuns ha deliberà ier diversas intervenziuns parlamentara per franar l'augment constant dals custs per la sanadad publica. L'onn proxim vul il cussegl federal sutta metter als acturs la nova strategia e propostas concretas.** En ina moziun pretenda *Erich Ettlín* (pcd/OW) d'avrir ils cunfins per medicaments ch'ins cumpra en noss pajais vischins e la pussaivladad da laschar tractar er en ospitals da l'exteriur sin quintar da la cassa da malsauns. Il moziunari fa attent als custs per la sanadad che s'augmentan senza fin ed als pretschs per ils medicaments che custan en l'exteriur per part mo la mesadad. En vista a quella situaziun, saja necessari da dismetter il princip territorial e d'avrir ils cunfins sin il sector da la sanadad publica. L'Assicuranza da malsauns patechia sut quest reschim d'isolaziun e d'insla da pretschs. La cumpra da medicaments sur cunfins duai restar facultativa e dependenta d'in recept dal medi.

### Mesiras per franar ils custs

En ina segunda moziun pretenda Ettlín ina midada da la lescha davart l'Assicuranza da sanadad che duai lubir al cussegl federal da prender mesiras per franar l'augment dals custs sche las premias per las cassas da malsauns s'augmentan per diesch pertschient dapli che las pajas. Ettlín fa allusiun a l'augment massiv e

constant da las premias. Quellas èn sa dublegiadas dapli l'introducziun da la nova lescha l'onn 1996.

### Surprovediment

En ina interpellaziun fa attent *Alex Kuprecht* (pps/SZ) al surprovediment tar ils tractaments medicinali en ils ospitals ed a l'augment da las intervenziuns ambulantas. Lezzas muntan in spustament dals custs vi sin ils pajapremias. Divers chantuns han elavurà glistas da las intervenziuns che duain succeder en moda ambulanta. Tar ils ospitals vegnan princip economic mess cun ils pes ensi, crititgescha l'interpellant. Ils ospitals schlargian lur prestaziuns senza fin e tschentan quella en il center da lur agir, empè da sa drizzar tenor ils vairs basegns dals pazients. Mintga ospital defenda ses agens interess. Ina coordinaziun da la planisaziun dals ospitals n'existia betg. Kuprecht propona perquai da crear regiuns da sanadad che cumpeggia plirs chantuns. Il cussegl federal duai far dapli diever da sisas cumpetenzas da surveglianza e d'intervenziun. In svilup sco ils ultims onns mainia senz'ater ad in collaps finanziar, ha admoni Kuprecht.

En il num da la cumissiun fa attent *Roland Eberle* (pps/TG) al rapport dals experts sut il presidi da *Verena Diener*. Ils spezialists en dumondas da la sanadad (er internaziunals) han confruntà la situaziun en Svizra cun quella dals pajais vischins ed elavurà 38 propostas per pudair

diriger meglier il svilup dals custs sin il sector da la sanadad. En vista a questa situaziun ha il cussegl dals chantuns refusà las moziuns. La chombra pitschna vul uss spetgar las propostas da la regenza. Ina nova strategia

*Alain Berset*, il minister da la sanadad publica, conferma ch'il cussegl federal è cunscent da la situaziun nuncuntenaivla. Quella pretenda mesiras concretas per l'avignir. La revisiun dal Tarmed sin l'entschatta da l'onn 2018 munta gia ina acciun en il senn giavischè. Sin fundament dal rapport dals experts è il cussegl federal uss vidlonder d'elavurar ina strategia per l'avignir (*Gesundheit 2020*). Proximamain vegn el a sutta metter diversas propostas concretas per mauns dals acturs sin il sector da la sanadad. En connex cun questa lavur vegnan er evaluadas las propostas da cusseglier dals stadis Ettlín e da ses collega Kuprecht. Mesiras difficilas èn necessarias. In plafonament da las prestaziuns medicalas n'è nagin tema. Per il cussegl federal è il princip territorial da gronda muntada per la Svizra. E tutina è la regenza averta per ina avertura controllada. Quai che appartegna l'intervenziun da Kuprecht sustegna il cussegl federal la pretensiun d'ina meglera coordinaziun sur ils cunfins chantunals or e da reducir intervenziuns medicalas senza in vair basegn. La planisaziun dals ospitals tras ils chantuns è vinavant necessaria e quella duai restar en lur cumpetenza, ha accentuà Berset.